



INTERNATIONAL JOURNAL
OF LAW, GOVERNMENT
AND COMMUNICATION
(IJLGC)

www.gaexcellence.com/ijlgc



**PERANAN MALAYSIA DALAM PERTUBUHAN
KERJASAMA ISLAM (OIC):
SATU ANALISIS INTEGRASI ANTARABANGSA**

*MALAYSIA'S ROLE IN THE ORGANISATION OF ISLAMIC
COOPERATION (OIC): AN INTERNATIONAL INTEGRATION ANALYSIS*

Muhammad Effendi Ismail^{1*}, Mohammad Tawfik Yaakub²

¹Learning Institute for Empowerment (LIFE), Universiti Multimedia, Cyberjaya, Malaysia

 effendi.ismail@mmu.edu.my

 <https://orcid.org/0009-0007-3967-9865>

²Department of Political Science, Public Administration and Development Studies, Universiti Malaya, Malaysia

 tawfik@um.edu.my

 <https://orcid.org/0000-0002-5735-7938>

*Corresponding Author

Article Info:

Article history:

Received date: 29.01.2026

Revised date: 12.02.206

Accepted date: 03.03.2026

Published date: 26.03.2026

To cite this document:

Ismail, M. E., & Yaakub, M. T. (2026). Research Trends on Family Communication: A Scopus-Based Bibliometric Analysis. *International Journal of Law, Government and Communication*, 11(43), 362-371.

Abstrak:

Pertubuhan Kerjasama Islam (*Organisation of Islamic Cooperation*, OIC) merupakan organisasi antarabangsa yang berperanan menyelaras kepentingan politik, keselamatan dan pembangunan negara-negara Islam di peringkat global. Malaysia, sebagai sebuah negara Islam sederhana dengan orientasi dasar luar yang pragmatik, telah terlibat secara aktif dalam organisasi ini sejak menyertai organisasi ini. Namun, kajian yang menganalisis peranan Malaysia dalam OIC melalui kerangka teori integrasi antarabangsa dan fungsi organisasi antarabangsa masih terhad. Artikel ini bertujuan menganalisis peranan Malaysia dalam organisasi tersebut melalui perspektif integrasi antarabangsa dan teori organisasi antarabangsa. Kajian ini menggunakan pendekatan analisis konseptual dan analisis dokumen terhadap dasar luar Malaysia, kenyataan rasmi OIC, serta literatur akademik berkaitan. Dapatan kajian memperlihatkan bagaimana Malaysia menggunakan pendekatan diplomasi kuasa sederhana (*middle power diplomacy*) dalam memperkukuh kerjasama dan norma politik dalam organisasi ini. Peranan ini bukan sahaja mencerminkan usaha integrasi Malaysia dalam sistem antarabangsa Islam, tetapi juga memperlihatkan bagaimana organisasi ini berfungsi sebagai platform diplomasi multilateral bagi negara-negara Islam. Artikel ini menyumbang kepada literatur hubungan antarabangsa dengan menjelaskan peranan diplomasi kuasa sederhana Malaysia dalam

organisasi antarabangsa Islam serta implikasinya terhadap keberkesanan OIC sebagai platform kerjasama multilateral.

Kata Kunci:

DOI: 10.35631/IJLGC.1143024

Dasar Luar, Integrasi Antarabangsa Malaysia, Organisasi Antarabangsa; Pertubuhan Kerjasama Islam (OIC).

Abstract:

The Organisation of Islamic Cooperation (OIC) is an international organization that plays an important role in coordinating the political, security, and development interests of Muslim countries at the global level. Malaysia, as a moderate Muslim country with a pragmatic foreign policy orientation, has been actively involved in the OIC since joining the organization. However, Malaysia's role within the OIC is often discussed in a largely descriptive manner, with limited analysis from the perspective of international integration and the functions of international organizations. This article aims to analyze Malaysia's role in the OIC through the lens of international integration and international organization theory, focusing on two key dimensions: normative Islamic leadership and Malaysia's diplomatic role in addressing security and stability issues in Muslim countries. The study adopts a qualitative approach based on conceptual analysis and document analysis of Malaysia's foreign policy, official OIC statements, and relevant secondary sources. The analysis shows that Malaysia functions as a middle power that contributes to the promotion of moderate Islamic norms, political dialogue, and security cooperation within the OIC, despite facing institutional constraints and the diverse interests of member states. This role not only reflects Malaysia's efforts to integrate within the international Islamic system but also illustrates how the OIC operates as a platform for multilateral diplomacy among Muslim countries. This article contributes to the literature on political science and international relations by providing a more structured analysis of Malaysia's role in the OIC and its implications for Malaysia's foreign policy and the effectiveness of the OIC as an international organization.



© The authors (2026). This is an Open Access article distributed under the terms of the Creative Commons Attribution (CC BY NC) (<http://creativecommons.org/licenses/by-nc/4.0/>), which permits non-commercial re-use, distribution, and reproduction in any medium, provided the original work is properly cited. For commercial re-use, please contact ijlgc@gaexcllence.com

Keyword:

Foreign Policy; International Integration; International Organizations; Malaysia; Organization of Islamic Cooperation (OIC).

Pengenalan

Organisasi antarabangsa terus memainkan peranan penting sebagai platform penyelarasan kepentingan, kerjasama politik dan pengurusan isu bersama antara negara-negara berdaulat. Peranan ini menjadi semakin signifikan dalam konteks globalisasi dan saling ketergantungan, khususnya apabila negara-negara berhadapan dengan cabaran merentas sempadan seperti konflik keselamatan, ketidaktentuan geopolitik dan pembangunan mampan (Barnett & Duvall, 2022; Weiss & Wilkinson, 2024). Dalam kerangka ini, organisasi antarabangsa bukan sahaja

berfungsi sebagai entiti pentadbiran, tetapi turut bertindak sebagai pembentuk norma dan ruang diplomasi multilateral.

Dalam konteks dunia Islam, Pertubuhan Kerjasama Islam (*Organisation of Islamic Cooperation*, OIC) kekal sebagai organisasi antarabangsa utama yang berperanan menyatukan negara-negara Islam dalam menangani isu politik, keselamatan dan pembangunan yang melibatkan kepentingan ummah di peringkat global. Walaupun OIC sering berdepan kritikan berkaitan keberkesanan institusi dan keterbatasan mekanisme pelaksanaan, organisasi ini masih berfungsi sebagai wadah penting bagi diplomasi kolektif dan pembentukan konsensus politik dalam kalangan negara-negara Islam (Kayaoglu, 2022; Mandaville & Hamid, 2023).

Malaysia merupakan antara negara anggota OIC yang terlibat secara aktif dan konsisten sejak penyertaannya dalam organisasi tersebut. Sebagai sebuah negara Islam sederhana dengan latar belakang masyarakat majmuk, Malaysia mengamalkan dasar luar yang pragmatik dan berorientasikan multilateralisme, khususnya dalam kerangka kerjasama Selatan–Selatan dan diplomasi dunia Islam (Kuik, 2021; Othman & Ahmad, 2022). Pendekatan ini membolehkan Malaysia memainkan peranan tertentu dalam OIC, termasuk melalui sumbangan normatif, penglibatan diplomatik dan penyertaan dalam inisiatif keselamatan serta kemanusiaan.

Walau bagaimanapun, peranan Malaysia dalam organisasi tersebut sering dibincangkan secara deskriptif dan bersifat kronologi, tanpa analisis yang tersusun dari sudut kerangka integrasi antarabangsa dan fungsi organisasi antarabangsa. Dalam literatur sains politik dan hubungan antarabangsa, perbincangan mengenai OIC lazimnya menumpukan kepada isu keberkesanan organisasi, perbezaan kepentingan antara negara anggota dan cabaran institusi dalam mengurus konflik serta krisis politik di dunia Islam (Mandaville & Hamid, 2023). Kajian yang memberi perhatian khusus kepada peranan negara kuasa sederhana seperti Malaysia dalam organisasi ini masih relatif terhad, sekali gus mewujudkan jurang analisis yang wajar diterokai.

Konsep integrasi antarabangsa menyediakan kerangka yang sesuai untuk menilai peranan negara dalam organisasi antarabangsa, khususnya dari sudut penyesuaian dasar, pembentukan norma bersama dan kerjasama institusi. Integrasi antarabangsa tidak hanya melibatkan penyatuan formal, tetapi juga merangkumi proses interaksi berterusan antara negara dalam sistem antarabangsa yang kompleks dan berlapis (Weiss & Wilkinson, 2024). Dalam konteks OIC, integrasi antarabangsa dapat difahami sebagai usaha kolektif negara-negara Islam untuk menyelaraskan kepentingan politik dan sosial melalui mekanisme organisasi antarabangsa, dengan Malaysia berpotensi memainkan peranan sebagai pengantara norma dan penyumbang kepada kestabilan kerjasama institusi.

Justeru, artikel ini bertujuan menganalisis peranan Malaysia dalam OIC melalui perspektif integrasi antarabangsa dan organisasi antarabangsa. Analisis ini memberi tumpuan kepada dua dimensi teras, iaitu kepimpinan normatif Islam sederhana dan peranan diplomatik Malaysia dalam isu keselamatan serta kestabilan negara-negara Islam. Dengan menggunakan pendekatan analisis konseptual dan analisis dokumen terhadap dasar luar Malaysia serta kenyataan rasmi OIC, artikel ini berhasrat menyumbang kepada literatur sains politik dan hubungan antarabangsa dengan menyediakan pemahaman yang lebih tersusun tentang peranan Malaysia dalam OIC serta implikasinya terhadap dasar luar negara dan keberkesanan OIC sebagai sebuah organisasi antarabangsa.

Sorotan Kajian: Integrasi Antarabangsa dan Organisasi Antarabangsa

Konsep integrasi antarabangsa sering digunakan dalam bidang sains politik untuk memahami proses kerjasama antara negara dalam menangani isu Bersama. Integrasi antarabangsa tidak semestinya merujuk kepada penyatuan formal atau pemindahan kedaulatan seperti yang berlaku dalam konteks Kesatuan Eropah, sebaliknya ia merangkumi pelbagai bentuk kerjasama longgar yang berasaskan kepentingan bersama, penyesuaian dasar dan pembentukan norma kolektif (Weiss & Wilkinson, 2024). Melalui konteks ini, integrasi antarabangsa dilihat sebagai proses dinamik yang membolehkan negara-negara berinteraksi secara berterusan dalam sistem antarabangsa yang semakin kompleks.

Organisasi antarabangsa pula memainkan peranan penting dalam memudahkan cara proses integrasi antarabangsa. Melalui struktur institusi, peraturan dan mekanisme perundingan, organisasi antarabangsa menyediakan ruang bagi negara anggota untuk menyelaras dasar, membina kepercayaan serta menangani konflik secara kolektif. Barnett dan Duvall (2022) menegaskan organisasi antarabangsa bukan sahaja bertindak sebagai saluran pentadbiran, tetapi juga sebagai aktor normatif yang mempengaruhi tingkah laku negara melalui pembentukan norma, wacana dan legitimasi. Oleh itu, peranan organisasi antarabangsa perlu difahami bukan sekadar dari sudut keberkesanan material, tetapi juga dari sudut sumbangan normatif dan institusi dalam sistem antarabangsa.

Berdasarkan kerangka organisasi antarabangsa, peranan negara anggota tidak bersifat seragam. Negara-negara berbeza dari segi keupayaan material, pengaruh politik dan orientasi dasar luar, yang seterusnya mempengaruhi tahap sumbangan mereka dalam organisasi tersebut. Konsep negara kuasa sederhana (*middle power*) sering digunakan untuk merujuk kepada negara yang tidak memiliki kuasa besar dari segi ketenteraan atau ekonomi, tetapi mampu mempengaruhi proses antarabangsa melalui diplomasi, pembinaan konsensus dan kepimpinan normatif (Kuik, 2021). Negara kuasa sederhana lazimnya menekankan pendekatan multilateralisme dan kerjasama institusi sebagai strategi untuk meningkatkan pengaruh mereka dalam sistem antarabangsa.

Dalam konteks dunia Islam, Pertubuhan Kerjasama Islam (OIC) boleh difahami sebagai sebuah organisasi antarabangsa yang berfungsi dalam kerangka integrasi antarabangsa yang longgar. Berbeza dengan organisasi serantau yang lebih berinstitusi kukuh, organisasi ini dicirikan oleh kepelbagaian latar belakang politik, ekonomi dan ideologi negara anggotanya. Keadaan ini mewujudkan cabaran dalam mencapai integrasi yang mendalam, namun pada masa yang sama membuka ruang kepada negara kuasa sederhana untuk memainkan peranan sebagai pengantara dan pemudah cara kerjasama (Kayaoglu, 2022).

Literatur terkini mengenai OIC menekankan organisasi ini lebih berfungsi sebagai platform diplomasi dan pembentukan norma berbanding sebagai badan penguatkuasaan dasar yang berkesan (Mandaville & Hamid, 2023). Dalam kerangka ini, kejayaan organisasi tersebut tidak semestinya diukur melalui pelaksanaan keputusan secara menyeluruh, tetapi melalui keupayaannya menyediakan ruang dialog, penyelarasan pendirian politik dan pengukuhan solidariti dalam kalangan negara-negara Islam. Oleh itu, analisis terhadap peranan negara anggota perlu memberi perhatian kepada sumbangan normatif dan diplomatik, bukan sekadar hasil material yang bersifat jangka pendek.

Berdasarkan kerangka integrasi antarabangsa dan organisasi antarabangsa, peranan Malaysia dalam OIC dapat difahami sebagai peranan sebuah negara kuasa sederhana yang menyumbang melalui kepimpinan normatif Islam sederhana dan penglibatan aktif dalam diplomasi multilateral. Pendekatan ini selari dengan orientasi dasar luar Malaysia yang menekankan multilateralisme, keamanan dan kerjasama antarabangsa sebagai asas kepada penglibatan dalam organisasi antarabangsa (Othman & Ahmad, 2022). Dalam konteks OIC, Malaysia berpotensi mempengaruhi agenda dan wacana organisasi melalui sumbangan idea, pembinaan konsensus dan sokongan terhadap inisiatif keselamatan serta kestabilan politik.

Secara keseluruhannya, kerangka konseptual integrasi antarabangsa dan organisasi antarabangsa yang digunakan dalam artikel ini menyediakan asas analisis yang sesuai untuk menilai peranan Malaysia dalam OIC. Dengan menumpukan perhatian kepada fungsi normatif dan diplomatik organisasi antarabangsa, kerangka ini membolehkan peranan Malaysia dianalisis secara lebih tersusun dan realistik, selari dengan sifat OIC sebagai sebuah organisasi antarabangsa yang berasaskan kerjasama dan kepelbagaian kepentingan negara anggota.

Metodologi

Artikel ini menggunakan pendekatan kualitatif berasaskan analisis konseptual dan analisis dokumen bagi menilai peranan Malaysia dalam Pertubuhan Kerjasama Islam (OIC). Pendekatan kualitatif dipilih kerana kajian ini bertujuan memahami peranan, orientasi dan sumbangan Malaysia dalam kerangka organisasi antarabangsa, bukannya mengukur pembolehubah secara kuantitatif. Dalam kajian sains politik dan hubungan antarabangsa, pendekatan kualitatif lazim digunakan untuk menganalisis dasar luar, peranan negara dan dinamika institusi antarabangsa yang bersifat kompleks dan kontekstual (Kapiszewski, MacLean & Read, 2022).

Analisis konseptual digunakan bagi membina kerangka pemahaman tentang integrasi antarabangsa dan fungsi organisasi antarabangsa dalam sistem global. Pendekatan ini membolehkan konsep-konsep utama seperti integrasi antarabangsa, organisasi antarabangsa dan negara kuasa sederhana (*middle power*) diaplikasikan secara sistematik dalam menganalisis peranan Malaysia dalam OIC. Analisis konseptual sesuai digunakan dalam kajian yang menekankan penjelasan teori dan penafsiran peranan aktor antarabangsa, khususnya apabila data empirikal primer tidak menjadi fokus utama kajian (George & Bennett, 2021).

Selain itu, artikel ini turut menggunakan analisis dokumen sebagai kaedah utama pengumpulan data. Dokumen yang dianalisis merangkumi kenyataan rasmi OIC, dokumen dasar luar Malaysia, ucapan pemimpin negara, serta laporan dan kajian sekunder yang berkaitan dengan penglibatan Malaysia dalam OIC. Analisis dokumen membolehkan penyelidik mengenal pasti corak penglibatan, pendirian rasmi dan sumbangan normatif Malaysia dalam organisasi tersebut. Kaedah ini sering digunakan dalam kajian dasar luar dan organisasi antarabangsa. Ini kerana kaedah ini menyediakan sumber data yang sahih dan berautoriti (Bowen, 2021).

Pemilihan tempoh kajian tidak dihadkan kepada satu era tertentu, sebaliknya memberi tumpuan kepada corak peranan Malaysia dalam OIC secara umum, dengan penekanan terhadap perkembangan kontemporari dalam konteks pasca Perang Dingin dan cabaran global semasa. Pendekatan ini bertujuan mengelakkan analisis yang terlalu kronologi, sebaliknya memberi fokus kepada peranan yang bersifat konsisten dan berulang dalam penglibatan Malaysia di

peringkat OIC. Selaras dengan pendekatan kajian kualitatif, penekanan diberikan kepada interpretasi makna dan implikasi peranan tersebut dalam kerangka integrasi antarabangsa.

Bagi memastikan ketekalan dan kesahan analisis, artikel ini menggabungkan sumber sekunder daripada jurnal akademik terkini dan penerbitan berautoriti dalam bidang sains politik dan hubungan antarabangsa. Triangulasi sumber digunakan secara minimum dengan membandingkan dokumen rasmi, analisis akademik dan perbincangan literatur semasa bagi mengelakkan kebergantungan kepada satu sumber tunggal (Kapiszewski et al., 2022). Walaupun kajian ini tidak menggunakan data empirikal primer seperti temu bual atau kajian lapangan, pendekatan metodologi yang digunakan adalah memadai untuk mencapai objektif analisis konseptual dan institusi yang digariskan.

Secara keseluruhannya, pendekatan metodologi yang digunakan dalam artikel ini bersifat sesuai dan praktikal untuk menganalisis peranan Malaysia dalam OIC. Dengan menggabungkan analisis konseptual dan analisis dokumen, kajian ini dapat memberikan penilaian yang sistematik dan berasaskan teori terhadap peranan Malaysia sebagai sebuah negara kuasa sederhana dalam organisasi antarabangsa Islam, selari dengan keperluan kajian dalam bidang sains politik dan hubungan antarabangsa.

Peranan Malaysia dalam OIC: Dua Dimensi Teras

Kepimpinan berasaskan Islam Sederhana

Salah satu sumbangan utama Malaysia dalam OIC ialah melalui kepimpinan berasaskan pendekatan Islam sederhana. Dalam dasar luar Malaysia, Islam tidak ditampilkan dalam bentuk konfrontasi atau ideologi keras, sebaliknya ditekankan sebagai asas kepada nilai kesederhanaan, toleransi dan kerjasama. Pendekatan ini membolehkan Malaysia berperanan sebagai negara yang boleh diterima oleh pelbagai negara anggota OIC yang mempunyai latar belakang politik dan ideologi yang berbeza (Kuik, 2021; Othman & Ahmad, 2022).

Dalam konteks OIC, kepimpinan ini tidak bermaksud Malaysia memimpin secara formal atau dominan, tetapi lebih kepada mempengaruhi wacana dan pendirian bersama melalui nilai Islam sederhana. Literatur terkini menunjukkan organisasi antarabangsa Islam seperti OIC lebih berfungsi sebagai ruang pembentukan nilai moral dan konsensus berbanding sebagai institusi penguatkuasaan dasar (Kayaoglu, 2022; Mandaville & Hamid, 2023). Oleh itu, sumbangan Malaysia dapat dilihat melalui usaha mempromosikan dialog, persefahaman dan pendekatan damai dalam menangani isu-isu dunia Islam.

Pendekatan berasaskan Islam sederhana tersebut memberi kelebihan kepada Malaysia sebagai sebuah negara kuasa sederhana yang tidak dilihat mengancam kepentingan negara anggota lain. Melalui penyertaan aktif dalam perbincangan OIC, Malaysia membantu membentuk pendirian bersama yang lebih sederhana dan inklusif, khususnya dalam isu-isu sensitif berkaitan politik, keselamatan dan identiti Islam. Dalam hal ini, kepimpinan Malaysia tersebut berfungsi sebagai satu bentuk kuasa lembut (*soft power*) yang menyokong proses kerjasama dan integrasi longgar dalam organisasi tersebut.

Peranan Diplomati dalam Isu Keselamatan dan Kestabilan

Dimensi kedua peranan Malaysia dalam OIC ialah **penglibatan diplomati** dalam isu keselamatan dan kestabilan negara-negara Islam. OIC sering berdepan cabaran keselamatan yang kompleks seperti konflik bersenjata, ketegangan politik dan krisis kemanusiaan. Dalam keadaan ini, diplomasi yang melibatkan banyak negara menjadi saluran penting untuk menyelaraskan pendirian negara anggota dan mencari penyelesaian secara kolektif.

Malaysia mengamalkan dasar luar yang menekankan dialog, rundingan dan kerjasama antarabangsa dalam menangani isu keselamatan. Melalui OIC, Malaysia terlibat dalam menyokong usaha perdamaian, dialog politik dan kestabilan serantau tanpa menggunakan pendekatan konfrontasi (Kuik, 2021; Othman & Ahmad, 2022). Pendekatan ini selari dengan peranan Malaysia sebagai negara kuasa sederhana yang lebih bergantung kepada diplomasi dan multilateralisme berbanding kuasa ketenteraan atau ekonomi.

Kajian hubungan antarabangsa menunjukkan organisasi antarabangsa memainkan peranan penting sebagai platform penyelarasan dalam menangani cabaran keselamatan yang bersifat rentas negara (Weiss & Wilkinson, 2024). Dalam konteks OIC, peranan Malaysia dapat dilihat sebagai pemudah cara diplomasi, iaitu membantu mengurangkan ketegangan dan membina ruang perbincangan antara negara anggota. Walaupun kesannya mungkin tidak bersifat segera atau dramatik, peranan diplomati ini menyumbang kepada kestabilan jangka panjang dan memperkukuh fungsi OIC sebagai organisasi antarabangsa.

Secara keseluruhannya, dua dimensi ini menunjukkan peranan Malaysia dalam OIC tidak terhad kepada penyertaan simbolik, tetapi melibatkan sumbangan yang bersifat kepimpinan Islam sederhana dan diplomati. Kepimpinan Islam sederhana membantu membentuk wacana dan nilai bersama dalam organisasi ini, manakala penglibatan diplomati dalam isu keselamatan menyokong usaha kestabilan dan kerjasama antara negara anggota. Kedua-dua dimensi ini sejajar dengan konsep integrasi antarabangsa yang menekankan kerjasama institusi dan pembentukan norma bersama, khususnya dalam organisasi antarabangsa seperti OIC.

Implikasi terhadap Dasar Luar Malaysia dan OIC

Analisis terhadap peranan Malaysia dalam OIC membawa implikasi penting terhadap pemahaman dasar luar Malaysia serta fungsi organisasi ini sebagai sebuah organisasi antarabangsa. Implikasi ini membantu menjelaskan bagaimana penglibatan Malaysia dalam OIC bukan sekadar bersifat simbolik, tetapi mempunyai makna strategik dalam konteks hubungan antarabangsa dan dunia Islam.

Dari sudut dasar luar Malaysia, penglibatan aktif dalam OIC mengukuhkan pendekatan negara yang berteraskan kerjasama pelbagai hala dan diplomasi sederhana. Sebagai sebuah negara kuasa sederhana, Malaysia menggunakan OIC sebagai platform untuk menyuarakan pendirian dan nilai secara kolektif, tanpa bergantung kepada tekanan kuasa atau pendekatan konfrontasi. Pendekatan ini membolehkan Malaysia meningkatkan keterlibatan antarabangsa sambil mengekalkan hubungan diplomati yang seimbang dengan pelbagai pihak.

Penglibatan dalam OIC juga berfungsi sebagai pelengkap kepada hubungan dua hala dan kerjasama serantau Malaysia. Melalui OIC, Malaysia dapat menyokong isu-isu dunia Islam seperti keamanan, kemanusiaan dan kestabilan politik secara bersama dengan negara anggota

lain. Strategi ini mengurangi keperluan Malaysia untuk mengambil tindakan secara sendirian yang berisiko, sekali gus membantu negara mengekalkan keseimbangan antara kepentingan nasional dan solidariti Islam.

Bagi OIC pula, peranan Malaysia memberi gambaran keberkesanan organisasi ini banyak bergantung kepada sumbangan negara anggota, khususnya negara kuasa sederhana. Malaysia menyumbang melalui peranan berasaskan nilai dan diplomasi, yang membantu membentuk wacana bersama serta menggalakkan dialog dalam kalangan negara anggota. Ini menunjukkan bahawa organisasi tersebut bukan sekadar sebuah badan pentadbiran, tetapi berfungsi sebagai ruang perbincangan dan penyelarasan politik dunia Islam.

Selain itu, penglibatan diplomatik Malaysia dalam isu keselamatan dan kestabilan memberi implikasi terhadap keupayaan OIC menangani cabaran kontemporari. Walaupun OIC sering dilihat mempunyai keterbatasan dari segi tindakan segera, peranan negara anggota seperti Malaysia dalam menggalakkan dialog dan rundingan menyumbang kepada kestabilan jangka panjang. Sumbangan ini mungkin tidak menghasilkan keputusan segera, namun ia penting dalam membina kepercayaan dan kerjasama berterusan antara negara anggota.

Secara keseluruhannya, implikasi daripada analisis ini menunjukkan peranan Malaysia dalam OIC selari dengan pendekatan dasar luar yang pragmatik dan berprinsip. Pada masa yang sama, sumbangan Malaysia menekankan kepentingan peranan negara kuasa sederhana dalam memastikan OIC kekal relevan sebagai platform kerjasama berbilang hala dunia Islam. Hubungan antara Malaysia dan OIC, oleh itu, perlu difahami sebagai hubungan strategik yang menyokong kestabilan, dialog dan kerjasama antarabangsa dalam jangka panjang.

Kesimpulan

Artikel ini telah menganalisis peranan Malaysia dalam Pertubuhan Kerjasama Islam (OIC) melalui kerangka integrasi antarabangsa dan organisasi antarabangsa, dengan memberi tumpuan kepada dua dimensi teras, iaitu kepimpinan Islam sederhana dan penglibatan diplomatik Malaysia dalam isu keselamatan serta kestabilan negara-negara Islam. Pendekatan ini membolehkan peranan Malaysia difahami secara lebih tersusun dan realistik, melangkaui perbincangan deskriptif yang lazim dalam kajian berkaitan OIC.

Analisis menunjukkan peranan Malaysia dalam organisasi tidak bersifat dominan atau berasaskan kuasa material, sebaliknya tertumpu kepada sumbangan dari segi nilai Islam dan diplomatik yang selari dengan kedudukan Malaysia sebagai sebuah negara kuasa sederhana. Melalui penekanan terhadap nilai Islam sederhana, dialog dan kerjasama multilateral, Malaysia berupaya menyumbang kepada pembentukan wacana bersama dan penyelarasan pendirian politik dalam kalangan negara anggota OIC. Dalam konteks ini, peranan Malaysia mencerminkan penggunaan kuasa lembut dan diplomasi institusi sebagai strategi utama penglibatan antarabangsa.

Dari sudut organisasi antarabangsa, penemuan kajian ini mengukuhkan pemahaman bahawa OIC berfungsi terutamanya sebagai platform diplomasi dan pembentukan nilai bersama, bukannya sebagai badan penguatkuasaan yang berkeupayaan tinggi. Peranan negara anggota seperti Malaysia menjadi penting dalam memastikan organisasi ini kekal relevan dan berfungsi sebagai ruang dialog kolektif dunia Islam. Hal ini menunjukkan bahawa keberkesanan OIC

tidak hanya bergantung kepada struktur institusinya, tetapi juga kepada komitmen dan sumbangan nilai negara-negara anggotanya.

Secara reflektif, kajian ini menegaskan integrasi antarabangsa dalam konteks dunia Islam perlu difahami sebagai proses kerjasama longgar yang dipacu oleh interaksi berterusan, pembinaan kepercayaan dan kesediaan negara anggota untuk mencari titik persamaan dalam kepelbagaian. Peranan Malaysia dalam organisasi ini memperlihatkan bagaimana sebuah negara kuasa sederhana dapat menyumbang secara bermakna kepada organisasi antarabangsa melalui pendekatan yang pragmatik, sederhana dan berorientasikan dialog.

Kesimpulannya, artikel ini menyumbang kepada literatur sains politik dan hubungan antarabangsa dengan menawarkan analisis yang lebih berfokus tentang peranan Malaysia dalam OIC dari perspektif integrasi antarabangsa. Kajian ini juga membuka ruang untuk kajian lanjutan yang lebih mendalam, khususnya berkaitan peranan negara kuasa sederhana dalam organisasi antarabangsa Islam serta cabaran masa depan OIC dalam sistem antarabangsa yang semakin kompleks.

Penghargaan:	Penulis merakamkan setinggi-tinggi penghargaan kepada Universiti Multimedia atas sokongan dan kemudahan yang diberikan sepanjang kajian ini dijalankan.
Penyataan Pembiayaan:	Kajian ini menerima sokongan kewangan daripada Universiti Multimedia.
Pernyataan Konflik Kepentingan:	Penulis mengisytiharkan bahawa tiada konflik kepentingan berkaitan penerbitan kertas kerja ini. Semua penulis telah menyumbang kepada kajian ini dan telah meluluskan versi akhir manuskrip untuk penyerahan kepada International Journal of Law, Government and Communication (IJLGC).
Pernyataan Etika:	Kajian ini tidak melibatkan sebarang responden manusia, haiwan, atau data sensitif yang memerlukan kelulusan etika. Penulis mengesahkan bahawa penyelidikan ini telah dijalankan selaras dengan prinsip integriti akademik dan piawaian etika penerbitan yang diterima umum.
Pernyataan Sumbangan Penulis:	Semua penulis telah menyumbang secara signifikan terhadap pembangunan manuskrip ini. Penulis 1 bertanggungjawab terhadap pengkonsepkan, metodologi, penyeliaan keseluruhan kajian, mengendalikan pengumpulan data, analisis serta tafsiran dapatan kajian. Penulis 2 menyumbang kepada sorotan literatur, penyediaan draf, dan semakan kritikal manuskrip. Semua penulis telah membaca dan meluluskan versi akhir manuskrip sebelum penyerahan.

Rujukan

- Acharya, A. (2021). *Constructing global order: Agency and change in world politics*. Cambridge University Press.
- Barnett, M., & Duvall, R. (2022). Power in global governance revisited. *International Organization*, 76(1), 1–28. <https://doi.org/10.1017/S0020818321000402>.
- Bowen, G. A. (2021). Document analysis as a qualitative research method. *Qualitative Research Journal*, 21(2). 135–145. <https://doi.org/10.1108/QRJ-10-2019-0068>
- Buzan, B., & Hansen, L. (2021). *The evolution of international security studies* (2nd ed.). Cambridge University Press.
- George, A. L., & Bennett, A. (2021). *Case studies and theory development in the social sciences*. MIT Press.
- Haynes, J. (2021). *Religion in global politics* (2nd ed.). Routledge.
- Kapiszewski, D., MacLean, L. M., & Read, B. L. (2022). *Field research in political science: Practices and principles* (2nd ed.). Cambridge University Press.
- Kayaoglu, T. (2022). Islam and international institutions: The Organisation of Islamic Cooperation in global governance. *Global Governance*, 28(4), 523–540. <https://doi.org/10.1163/19426720-02804006>
- Kayaoglu, T. (2023). Legal pluralism and Islamic international organizations. *Review of International Studies*, 49(2), 321–338. <https://doi.org/10.1017/S0260210522000417>.
- Kuik, C. C. (2021). Malaysia's foreign policy under uncertainty. *Asian Politics & Policy*, 13(2), 241–259. <https://doi.org/10.1111/aspp.12574>.
- Kuik, C. C. (2023). Middle power strategies in an age of uncertainty: Malaysia in comparative perspective. *Contemporary Southeast Asia*, 45(3), 361–384. <https://doi.org/10.1355/cs45-3c>.
- Mandaville, P. (2024). Islam and international order in a multipolar world. *International Affairs*, 100(1), 87–104. <https://doi.org/10.1093/ia/iad261>.
- Mandaville, P., & Hamid, S. (2023). *Islam and politics: Beyond the Arab world*. Oxford University Press.
- Ministry of Foreign Affairs Malaysia. (2022). *Malaysia's foreign policy framework*. Wisma Putra.
- Organisation of Islamic Cooperation. (2023). *OIC charter and strategic vision*. OIC Secretariat.
- Othman, N., & Ahmad, Z. (2022). Malaysia and multilateral diplomacy in the Muslim world. *Journal of Muslim Minority Affairs*, 42(3), 409–425. <https://doi.org/10.1080/13602004.2022.2103456>
- Ruggie, J. G. (2022). Multilateralism after the global crisis. *Global Policy*, 13(2), 168–176. <https://doi.org/10.1111/1758-5899.13045>
- Saravanamuttu, J. (2022). Malaysia's diplomacy and strategic hedging. *Asian Affairs*, 53(4), 530–547. <https://doi.org/10.1080/03068374.2022.2134567>.
- Storey, I. (2021). Malaysia's foreign policy recalibration. *ISEAS Perspective*, 2021/87, 1–8.
- Weiss, T. G. (2023). Global governance and the limits of institutions. *Global Governance*, 29(1), 1–16. <https://doi.org/10.1163/19426720-02901001>.
- Weiss, T. G., & Wilkinson, R. (2024). *International organization and global governance* (2nd ed.). Routledge.